



欽定四庫全書

12  
33  
77

子部

蘧家類存目九十一

12  
130  
73

十三



1128  
1330  
73

學

欽定四庫全書總目卷一百三十二

子部四十二

雜家類存目九

羣書摘草五卷

左都御史張若淮家藏本

明王國賓編國賓號養默武進人萬歷甲戌進士其作此書時方監權杭州北新關未詳其終於何官也其書仿庾仲容子鈔馬總意林之例摘取家語以下至明張時徹說林三十二種附以兵書七種每種各摘數段無所持擇蓋亦當時書帕之本

欽定四庫全書總目卷一百三十二子部 雜家類存目九

新錢文  
有物那

閨範四卷

浙江巡撫採進本

明呂坤撰坤有四禮疑已著錄此編乃其爲山西按察使時所作前一卷爲嘉言皆採六經及女誡女訓諸文爲之訓釋後三卷爲善行分女子婦人母道各一卷敘其本事而繪圖上方竝附以贊文頗淺近取易通俗也當時嘗傳入禁中神宗以賜鄭貴妃妃重刻之後妖書案起遂以是書爲口實朱國楨湧幢小品曰呂新吾司寇廉察山西纂閨範一書焦弱侯以使事至呂索序刊行弱侯亦取

數部入京鄭貴妃之姪國泰乞取添入后妃一門而貴妃與焉猥大譁謂鄭氏著書弱侯交結爲序將有他志云云所紀與史小異然國楨與焦竑爲友目睹刊本所記似得其真此本無鄭貴妃序當爲坤之原本也

百子咀華十四卷

兩江總督採進本

明胡效臣編效臣字鍾衡黃州人萬歷丙子舉人官旌德縣知縣是書取諸子之文而割裂之或摘其一段或拾其數語或撮其數字以供時文懶祭

之用首列左傳次六子次子彙次則以儒家道家  
法家兵家分類又以明人所著參錯於古人之中  
不知其體例何在又題曰焦竑批評竑之陋何至  
於此其依託可不問而知也

琅琊代醉編四十卷

編修汪如藻家藏本

明張鼎思撰鼎思有琅琊曼衍已著錄是編乃其  
自給事中謫滁州驛丞時雜鈔諸史百家之言臚  
次成書名曰代醉編者歐陽修在滁州時有醉翁  
亭鼎思適宦其地以著書代飲酒也其書體例龐

雜無所折衷考訂特借以消閒遣日而已

蘭芳錄二卷

江蘇巡撫探進本

明徐三重撰三重有餘言已著錄是編皆錄古人  
輕世遺榮之事分內外二篇自序謂內篇近自得  
外篇稍假物緣亦不八世累然會點之沂水春風  
置之外篇葉夢得之讀書飲酒置之內篇殊不曉  
其優劣之旨首冠以論語飯疏食一章賢哉回也  
一章別題曰孔顏樂事又不在內外篇之數則恐  
失講學本色耳

警語類鈔八卷

安徽巡撫  
採進本

明程達撰達字順甫清江人萬歷丁丑進士官至  
漳泉兵備道是編取先哲格言善行分類編次其  
目六十割裂冗雜殊無倫次凡例云是編重理學  
故諸儒要語獨詳然於仙則信淮南之上昇王母  
之降漢於釋則言滅佛之報應談禪之超悟均不  
免自亂其例也

諸經品節二十卷

通行  
本

明楊起元編起元有證學編已著錄是編刪纂道

釋二家之書道家凡陰符經道德經南華經太元  
經文始經洞古經大通經定觀經玉樞經心印經  
五廚經護命經胎息經龍虎經洞靈經黃庭經十  
六種釋家凡楞嚴經維摩經心經金剛經六祖壇  
經圓覺經楞伽經藥師經法華經無量經彌陀經  
孟蘭經十二種揚雄太元本為擬易諸史皆著錄  
於儒家此引之道家殆晉人老易歸一之旨至列  
子沖虛經刪而不載又不明其故矣起元傳良知  
之學遂浸淫八於二氏已不可訓至平生讀書為

儒登會試第一官躋九列所謂國之大臣民之表也而是書卷首乃自題曰比丘尤可駭怪矣

沈氏學叟十六卷

浙江巡撫採進本

明沈堯中撰堯中字執甫嘉興人萬歷庚辰進士官至刑部尚書其自序曰爲綱二十有四爲目三百五十有八皆宇宙內鴻鉅之事非草木鳥獸之類然雜採舊文無所考訂亦無所別擇如日月星宿諸占全錄天官書而不知太初之法最爲疎漏論周官則過信俞庭椿之說以爲冬官不亡散見

五官而不知割裂五官有乖經義蓋雜駁之學也

霞外塵談十卷

浙江巡撫採進本

明周應治編應治字君衡鄞縣人萬歷庚辰進士楊德周序稱爲觀察不知官何省何道也是書輯隱逸高尚之事分霞想鴻冥恬尚曠覽幽賞清鑒達生博雅寓因感適十類大抵以世說新語爲藍本而稍以諸書附益之至於雲仙散錄師古僞杜詩註之類影撰故實亦皆摭拾殊無別裁又多不見原書輾轉裨販如披裘公不取遺金玉摩詰詩

中有畫列子鄭人蕉鹿諸條尤割裂不成文理至  
於宗慤乘風破浪鮑生愛妾換馬全與高隱無關  
不過雜湊以盈卷帙耳

宋賢事彙二卷

浙江汪啟淑家藏本

明李廷機撰廷機有漢唐宋名臣錄已著錄是編  
雜採史書說部所載宋人行事分爲四十三類首  
有自序謂宋之世風人材頗類今日言論行事往  
往有可用者云云宋明之季儒者如出一轍此類  
亦可以觀矣

說類六十二卷

安徽巡撫採進本

明葉向高編林茂槐增刪向高字進卿號臺山福  
清人萬歷癸未進士官至東閣大學士諡文忠事  
蹟具明史本傳茂槐有諸書字考已著錄是書摘  
唐宋說部之文分類編次每類之下各分子目每  
條下悉註原書然皆習見之典別無新異其上細  
書評語體例尤爲近俗

遜世編十四卷

兩淮鹽政採進本

明錢一本撰一本有像象管見已著錄是編紀古

來隱逸之士自唐虞至元分神隱真隱儒隱節隱  
俠隱哲隱達隱高隱別隱九類蕪雜殊甚疎漏尤  
多如不知姓名謂之真隱然所謂阮籍遇蘇門山  
人卽是孫登不得曰無姓名也又顧阿瑛以晚年  
祝髮入之別隱褚伯秀本爲黃冠乃入之高隱梁  
鴻無排難解紛之事乃入之俠隱林靈素詭譎羽  
流亦曰別隱皆未爲允協其他亦多科配未確  
簡擇未當者一本研心經學所著易解能自成一  
家之言不應此書獨乖刺如是蓋一本以建言罷

歸姑借此以抒忘情仕宦之志考據則非其所留  
意也

廉平錄五卷

江蘇巡撫  
採進本

明傅履禮高爲表同撰履禮題長蘆鹽運司知事  
爲表題滄州學正其始末均未詳也是書採前代  
至明事蹟分類編輯凡廉錄三卷曰卿相曰館閣  
曰憲臺曰省郎曰監司曰守令曰武臣平錄二卷  
曰畿內曰外藩曰郡州曰列縣廉者操守平者聽  
斷也每類之中各以時代爲次萬歷戊子長蘆巡



鹽御史東莞譚耀刻之蓋耀命二人編輯以充書  
帕者耳

焦氏類林八卷 江西巡撫  
採進本

明焦竑撰竑有易筌已著錄是編前有自序謂庚  
辰讀書有感葛稚川語遇會心處輒以片紙記之  
殘藁委於篋笥李君士龍見之乃手自整理取世  
說篇目括之其不盡者括以他目譬之溝中之斷  
文以青黃則士龍之為也士龍為上元李登字然  
則竑特偶為標出而成此書者則登也凡分五十

有九類皆非奇祕之文

二十九子品彙釋評二十卷 江蘇周厚  
堉家藏本

題曰翰林三狀元會選前列焦竑翁正春朱之蕃  
三人名其書雜錄諸子毫無倫次評語亦皆託名  
謬陋不可言狀蓋坊賈射利之本不足以當指摘  
者也

田居乙記四卷 浙江巡撫  
採進本

明方大鎮撰大鎮有荷薪義已著錄是編乃其家  
居讀書時所作自序謂遇有賞心輒乙其處命兒

子錄之故名乙記分四門一曰潛見分記學記仕  
二子目二曰筌宰分記君記臣二子目三曰伐閱  
分記操持記作用二子目四曰居息分記家倫記  
性命二子目所錄雖皆前人格言善事然條綴原  
文無所闡發其出處或註或否體例亦不畫一

省括編二十三卷

編修勵守  
謙家藏本

明姚文蔚撰文蔚有周易荀註會通已著錄是編  
採史傳中先機應變之迹自春秋至元季彙爲一  
書分言事兵爲三類以省括名編蓋取太甲若虞

機張往省括於度則釋之義然兵亦事也分類未  
允閒有論斷亦未見特識特書生好談作用者耳

智品十三卷

安徽巡撫  
採進本

明樊玉衡撰於倫補葺玉衡字元之萬歷乙未進  
士官崑山縣知縣倫字愔之萬歷辛丑進士官至  
右通政皆黃岡人是編蒐輯古初至明代用智之  
事分爲七門一曰神品察兆於未萌者也二曰妙  
品知幾於將至者也三曰能品救敗於已然者也  
四曰雅品端士之善應變者也五曰具品小才之

偶見長者也六曰譎品純任術者也七曰盜品陰賊害正者也雜隸古事而皆不著其所出如趙簡子欲殺孔子之事出宋人僞子華子管仲諸事出管子輕重諸篇詞皆依託而信爲實然未免失於考證又輔過絺疵得列神品與大禹同科而文王周公乃僅入妙品殊爲倒置至竇良女蠟書滅賊厥志可尙而乃列之盜品中尤乖刺矣

再廣歷子品粹十二卷

江蘇周厚堦家藏本

舊本題明湯賓尹編賓尹字嘉賓宣城人萬歷乙

未進士官南京國子監祭酒考明史藝文志及江南通志皆無此書名卷前題爲百大家批評會元湯賓尹輯諸名筆錄註書林余象斗梓前有賓尹序稱雙峰堂余君鋟正歷子行矣爰授以廣歷子云云卷端稱再廣歷子中縫又稱續廣歷子已參錯無緒而所列二十四家子書又多杜撰名目如六韜謂之尙父子詩外傳謂之韓詩子潛夫論謂之王符子忠經謂之馬融子劉晝新論謂之孔昭子論衡謂之王充子前後出師表謂之孔明子陸

贊奏議謂之陸宣子駱賓王集謂之賓王子殆於一字不通賓尹雖僅工時文原非讀書稽古之士亦不荒謬至此疑或託名歟

續說郛四十六卷

通行本

明陶珽編珽姚安人萬歷庚戌進士是編增輯陶宗儀說郛迄於元代復雜鈔明人說部五百二十七種以續之其刪節一如宗儀之例然正嘉以上淳朴未漓猶頗存宋元說部遺意隆萬以後運趨末造風氣日偷道學侈稱卓老務講禮宗山人競

述眉公矯言幽尚或清談誕放學音宋而不成或綺語浮華沿齊梁而加甚著書既易人競操觚小品日增卮言彞編求其卓然蟬蛻於流俗者十不二三珽乃不別而漫收之白葦黃茅殊爲冗濫至其失於考證時代不明車若水之脚氣集以宋人而見收鮮于樞之箋紙譜以元人而闕八又其小疵矣

智囊二十八卷

內府藏本

明馮夢龍編夢龍有春秋衡庫已著錄是編取古

人智術計謀之事分爲十部亦閒係以評語佻薄殊甚

智囊補二十八卷

內府藏本

明馮夢龍撰夢龍先於天啟丙寅成智囊一書以其未備復輯此編其初刻補遺一卷亦散入各類

譚槩三十六卷

內府藏本

明馮夢龍撰是編分類彙輯古事以供談資然體近俳諧無關大雅

知非錄二卷

浙江巡撫採進本

明黃時耀編時耀字德韜號我素新都人是書成於萬歷庚子雜鈔諸書分爲內外二篇內篇之目凡六首立志次爲學次存心次檢身次處家次應世外篇之目凡三日閒適曰攝養曰禪觀各目之中又自分子目頗爲糅雜其內篇勦取近思錄白警編讀書錄白沙集傳習錄居業錄擊壤集等書彙合而成端緒已多岐出外篇則竟涉異學矣蓋心學盛行之時無不講三教歸一者也

學古適用篇九十一卷

浙江巡撫採進本

次三四庫全書總目卷一百三十二

子部雜家類存目九

十三

明呂純如撰純如字孟諧一字益軒吳江人萬歷辛丑進士官至兵部侍郎是編採前代至明凡前事之可為後法者分類編次為九十一門亦間附以論斷前有自序謂馮慕岡經世實用義在憲章當世而明以前存而不論馮琢菴經濟類編羅列雖多間或不適於用萬思默經世要略其揚摧者止於就人彙事未嘗就事求人茲編大意仿三書之體而所列事蹟則以適於用者為主然事變靡常情勢各異譬之古方今病貴於臨證詳求亦未

可執以一定之法遽謂之適於用也

經史典與六十七卷

浙江巡撫採進本

明來斯行編斯行蕭山人萬歷丁未進士官至福建右布政使是編於經取易詩書春秋左傳禮記周禮於史取史記前後漢書各摘其字句標題於前而以經史原文及註詳列於後蓋以備詞章採擇之用不為考證設也斯行自序云昉跡於漢雋諸篇然考林鉞漢雋隨事輯類此則不分門目逐卷鈔撮專採字句之可用者蓋近司馬光徽語之

例非漢雋例也書凡六十七卷而序云八十六卷  
豈其後有所歸併未及追改前序歟

宗藩訓典十二卷

江蘇周厚  
培家藏本

明馮柯撰柯字貞白慈谿人以薦舉侍襄靖王書  
堂是編卽奉襄王令所作取史書中諸藩封行事  
可爲勸戒者摘錄其略各係以評起秦漢迄金元  
得宗屬七百二十三附與事之臣八十六共爲評  
一千一百三十八萬歷壬寅其子瑛進之王府命  
工刊刻

清寤齋欣賞編一卷

江蘇巡撫  
採進本

明王象晉撰象晉有羣芳譜已著錄是書分六類  
曰葆生要覽曰儆身懿訓曰佚老成說曰涉世善  
術曰書室清供曰林泉樂事皆摭明人說部爲之  
猶陳繼儒諸人之習氣也

稗史彙編一百七十五卷

浙江吳玉  
暉家藏本

明王圻撰圻有東吳水利考已著錄是書搜採說  
部分類編次爲綱者二十八爲目者三百二十所  
載引用書目凡八百八種而輾轉稗販虛列其名

欽定四庫全書總目卷一百三十二

子部 雜家類存目九

者居多如三輔決錄吳錄三齊略記太原記湘中  
記雞林志申子尸子之類圻雖博洽何由得見全  
帙又卷首雖列書名卷中乃皆不註出處是直割  
裂說部諸編苟盈卷帙耳

增定玉壺冰二卷

浙江巡撫  
採進本

明閔元衢編元衢有羅江東外紀已著錄初都穆  
採古來高逸之事題曰玉壺冰甯波張孺愿稍刪  
補之題曰廣玉壺冰元衢以為未盡復增定此編  
分紀事紀言為二卷仍列穆之原書於所加者則

註增字以別之山人墨客莫盛於明之末年刺取  
清言以誇高致亦一時風尚如是也據浙江通志  
此二卷外尚有補玉壺冰一卷亦元衢所著此本  
不載殆偶佚歟

古今長者錄八卷

兩江總督  
採進本

明黃文炤撰文炤字季弢晉江人萬歷中諸生是  
編輯周秦以迄明代忠厚長者之事大抵皆取其  
一節故人品不甚別擇末附別品六則則似薄而  
實厚者其導俗之心甚善書則不免蕪雜也



洄詞記事鈔一卷附明良記四卷

江蘇巡撫  
採進本

明李鶚狎編鶚狎字如一江陰人洄詞本崔銑所著文集鶚狎摘其論宋事及明初事蹟者六十一則為書其不涉記事者皆不錄續鈔三十六則皆前所挂漏也鶚狎自題云前鈔成於庚子秋備閱七載今春哀諸說部梓行之發篋得前鈔因同楊憲副二記附為一帙今二鈔之後惟楊儀明良記四卷前有鶚狎小引稱與保孤一記皆係祕本則所謂二記者乃合保孤記言之而此本佚其一耳

清賞錄十二卷

浙江鮑士  
恭家藏本

明張翼包衡同撰翼字二星餘杭人衡字彥平秀水人二人皆久困場屋棄去制義因共購閱古書採摭雋語僻事積而成帙一刻之秀州一刻之武林翼遊盤谷又重刻焉然多習見之詞特剽剗成書無裨考據

十可篇十卷

浙江巡撫  
採進本

明馬嘉松編嘉松字曼生平湖人萬歷末諸生是書摘錄子史及諸家小說分為十篇曰可景可味

可快可鄙可泯可坦可遠可諧可嘉可刪前有陳  
繼儒序及自序其可景可味可嘉三編多取古人  
嘉言善行以爲法餘七編多取古人醜行敗德以  
爲戒然徵引錯雜絕無體例評語尤多傷輕薄

舌華錄九卷

浙江巡撫  
採進本

明曹臣撰臣字蓋之歙縣人是書取前人問答雋  
語分類編輯凡十八門世說新語之餘波也所錄  
皆取面談凡筆札之詞不載故曰舌華取佛經舌  
本蓮華之意上起漢魏下逮明人頗爲猥雜原序

亦自言近時之事多所潤飾則非盡實錄可知矣

元壺雜俎八卷

安徽巡撫  
採進本

明趙爾昌撰爾昌字慶叔錢塘人官宣城縣知縣  
是書雜採史傳說部鈔合成編分勝事名言二紀  
各爲四卷大致欲仿沈括清夜錄周密澄懷錄之  
體而採掇蕪雜或註所出或不註所出亦無定例  
不過陳繼儒之流耳前有萬歷辛亥筮繼良序稱  
采之古者什七裁之今者什三則其隨意成書不  
盡有典據可知矣

欽定四庫全書  
雜錄目卷一百三十二  
敎家類纂八卷

編修勵守  
謙家藏本

明薛夢李編夢李字近泉嘉興人是書成於萬歷  
壬子摭取前人家訓及勸善諸書薈萃成編附以  
議論分四門首圖說次敦倫次治家次省身其言  
淺近蓋專爲愚蒙而說圖說摭拾湊合深者爲心  
學諸圖非常人所解俚者至於繪畫故事係之以  
說如云這一箇門內站的人是某朝某人云云又  
失之太鄙亦殊蕪雜不倫也

益智編四十一卷

浙江巡撫  
採進本

明孫能傳撰能傳有諡法纂已著錄是書成於萬  
歷甲寅凡分十有二類曰帝王曰宮掖曰政事曰  
職官曰財賦曰兵戎曰刑獄曰說詞曰人事曰邊  
塞曰工作曰雜事每類各爲子目凡七十有四俱  
雜採古來設奇應變之事閒附評語其凡例有曰  
期於盡事而止不復註所出書又曰所採事多斷  
章取義其始末應述不及致詳又曰是編雅俗竝  
收事多踏駁但取益人意智眞贗勿問之矣云云  
是其書之不足據能傳已自言之矣

法教佩珠二卷

山西巡撫採進本

明林有麟撰有麟有青蓮舫琴雅已著錄是書成於萬歷甲寅雜採儒先格言及二氏因果之語前有許樂善序稱其擷菁華於三教漱芳潤於百家則固明言其雜以釋道非純然儒者之書矣

經世環應編八卷

內府藏本

明錢繼登撰繼登字爾先又字龍門嘉善人萬歷丙辰進士官至僉都御史是書所採皆史籍權變之術亦省括編之流也

愧林漫錄十卷

浙江巡撫採進本

明瞿式耜撰式耜字起田常熟人萬歷丙辰進士官至右僉都御史巡撫廣西晉文淵閣大學士兼兵部尙書

大兵下廣西抗節死之事蹟具明史本傳乾隆四十四年

賜諡忠節是編成於崇禎丙子雜鈔諸儒之言分爲學問居心規家酬世在位積德讀書究竟攝生依隱十篇儒墨兼陳蓋林居時錄以自警大旨歸於爲

善而已非辨別學術之書也

掌錄

無卷數 安徽巡撫採進本

舊本題繡雲居士撰不著姓名時代其鈔書格紙邊頁刊繡雲居字蓋猶其手槁卷首小序之末有私印曰李輅而卷中天台陳剛中一條下有自註亦稱輅少失配恃則李輅所作又上闕有一條云吾邑顧升伯八丁未會場特落一人名而登所善門生李光元考文秉定陵註略載萬歷丁未湯賓尹為同考官有陰燬申時行子硃卷而改中江西

李光元事非顧升伯所記為誤然可知輅為萬歷以後人也其書雜鈔說部漫無體例多取之於說郭亦無異聞其曰掌錄意其取拾遺記蘇秦張儀錄書掌中事也

檢蠹隨筆三十卷

兩江總督採進本

明楊宗吾撰宗吾字伯相成都人官錦衣衛指揮大學士廷和之曾孫修撰慎之孫也是書為類二十有四採掇瑣碎分條編載體近類書而當時邸報及其祖父遺事亦閒附焉又有數條乃駁陳耀

文正楊之非及陳建通紀載楊廷和事之誤又麗句瑣語二門專取詩文詞藻與全書體例皆不相類殊為猥雜自序稱不問人之棄取惟意是採今古駁雜積成數卷蓋亦道其實也

厚語四卷

浙江巡撫採進本

明錢褰撰褰字懋登海鹽人萬歷中由貢生官於潛縣訓導是編皆錄長厚之事可為世法者故曰厚語分十六類皆以明人居前而古事以類列於後其凡例謂耳目所逮尤易信從云

偶得紺珠一卷

內府藏本

明黃秉石撰秉石字復子江甯人萬歷中以薦為推官官至嚴州府同知是編雜採諸書餽飭少緒又多不註出典蓋隨手筆記未有詮次體例也

培壘居雜錄四卷

浙江巡撫採進本

明鄭端允編端允字思孟海鹽人鄭曉之曾孫也是書雜採諸書勸戒之言至太上感應篇亦所不遺雖意主訓誨而其言不盡出於儒者蓋雜家流也

廣百川學海

無卷數 兩江  
總督採進本

舊本題明馮可賓編可賓益都人天啟壬戌進士  
是編於正續百川學海之外摭拾說部以廣之分  
為十集以十干標目然核其所載皆正續說部所  
有版亦相同蓋姦巧書賈於說部印版中抽取此  
一百三十種別刊序文目錄改題此名託言出於  
可賓也

湘煙錄十六卷

浙江吳玉  
埤家藏本

明閔元京凌義渠同編元京字子京烏程人義渠

之舅也未詳其所終義渠字駿甫此書亦題為烏  
程人而太學題名碑作歸安人蓋二縣同為湖州  
倚郭也天啟乙丑進士官至大理寺卿崇禎甲申  
殉國難

世祖章皇帝賜諡忠介事蹟具明史本傳其人自足不朽  
而其書乃不出明末山人之習所分咫聞清檢蘭  
訊鼎書奩史談啁金全補革志詔目偏記十門標名  
詭異大致欲仿段成式酉陽雜俎其雜採新事各  
註所出之書則欲仿馮贄雲仙雜記意在標舉幽

異而不免於剽竊類書如杜甫舊雨今雨之語見於本集原非僻書而註曰六帖不知白居易六帖無唐事有唐事者乃宋孔傳續六帖是既已疎漏且復舛誤又卷首參訂姓名列董斯張爲第二而書中多引廣博物志卽斯張所纂類書既非其所自撰何不出斯張所著書名乎捃拾無根斯亦顯證矣

雲邁淡墨六卷

浙江吳玉壩家藏本

明本增撰增字生白雲南麗江土司世襲土知府

以助餉征蠻功晉秩左布政使年甫三十卽謝職天啟五年特給誥命以旌其忠增好讀書多與文士往還是書蓋其隨筆摘鈔之本大抵直錄諸書原文無所闡發又多參以釋典道藏之語未免糅雜失倫特以其出自蠻陬故當時頗傳之云

子史碎語二十四卷

浙江巡撫探進本

明胡尚洪編尚洪字叔開宣城人是編成於天啟丙寅明史藝文志著錄然皆採摭諸書館訂而成分造化人事君道臣術四門又分子目三百八十



有三煩碎冗雜無復條理三墳天祿閣外史心書之類皆偽妄顯然者亦皆採錄至如割裂郭象莊子註謂之郭子亦自我作古前此未聞也

諸子拔萃八卷

內府藏本

明李雲翔編雲翔字爲霖江都人是書成於天啟丁卯取坊本諸子彙函割裂其文分爲二十六類其杜撰諸子名目則一仍其舊古今荒誕鄙陋之書至諸子彙函而極此書又爲之重儻天下之大亦何事靡有也

倘湖樵書十二卷

安徽巡撫採進本

明來集之撰集之有讀易隅通已著錄是書初編六卷二編六卷皆採摭唐宋元明諸家之說以類相從排纂其文而總括立一標目或雜引古書而論之或先立論而以古書證之徵摭繁富頗有考證之處而細大不捐蕪雜特甚亦多有迂僻可笑者如論經篇中引名賢錄所載宋章樵遇李全之亂率諸生盛服坐堂上講誦寇至斂刃而退事又引宋濂集所紀宋鄭霖講中庸一篇使寇退不敢

攻城事以爲讀經之效勝於修齋其他引讀經却  
鬼治病事不一而足然則以孔門聖籍爲二氏之  
符籙經懺矣

博學彙書十二卷

內府藏本

明來集之撰凡讀書所得隨筆記錄不分門目惟  
以類相從鱗次櫛比俾可互證視他書叢雜無次  
者較爲過之然所採多小說家言如拾遺洞冥諸  
記是豈足取以爲據乎

堯山堂外紀一百卷

浙江鮑士恭家藏本

明蔣一葵撰一葵字仲舒常州人堯山其讀書堂  
名也是書取記傳所載軼聞瑣事擇其稍僻者輯  
爲一編上起古初下迄明代每代俱以人名標目  
雅俗竝陳真偽竝列殊乏簡汰之功至以明諸帝  
分編八各卷之中尤非體例矣

家規輯要

無卷數 江西巡撫採進本

明胡燝撰燝有拾遺錄已著錄是書仿溫公家範  
呂氏鄉約之意採輯舊文排纂成編大槩爲中人  
以下設也

筆記二卷

浙江孫仰曾家藏本

明陳繼儒撰繼儒有邵康節外紀已著錄此書取雜事碎語鈔錄成帙略無倫次惟所載陸完跋顏書朱巨川告身一篇為鐵網珊瑚清河書畫舫諸書所未收亦可以備參考然已載所著見聞錄中此亦複出也

讀書十六觀一卷

浙江孫仰曾家藏本

明陳繼儒撰採古人成語自呂獻可以下凡十六條聯綴成編以為讀書之法命名之義蓋擬浮屠

氏之十六觀經也後有跋云寫前觀畢夢有老人自稱斲輪翁云云雖本寓言究涉荒渺此編嘗刻八祕笈中與書畫史誤合為一今析出別著於錄焉

羣碎錄一卷

內府藏本

明陳繼儒撰其書隨筆紀錄不暇考辨故以羣碎為名前有自跋謂讀書者一字一語不忍棄之然不應瑣雜如是也

珍珠船四卷

內府藏本

欽定四庫全書總目卷一百三十二子部 雜家類存自九

明陳繼儒撰是書雜採小說家言湊集成編而不著所出既病冗蕪亦有譌舛蓋明人好勦襲前人之書而割裂之以掩其面目萬歷以後往往皆然繼儒其尤著者也

銷夏四卷

內府藏本

明陳繼儒撰其書雜錄清勝之事取其可以銷夏如冰荷玉帳見於諸小說家者靡不採錄纖仄瑣碎亦可謂徒費心力矣

碎寒四卷

內府藏本

明陳繼儒撰繼儒既作銷夏四卷又成此書義例與銷夏相類如狻座蹲鴟之類皆泛載之尤為拉雜

古今韻史十二卷

副都御史黃登賢家藏本

明陳繼儒撰是書摭拾諸書雋語分類編次凡韻人二卷韻事二卷韻語三卷韻詩二卷韻詞二卷韻物一卷皆以古事與明人事參錄亦世說新語之支流而纖佻彌甚

福壽全書

無卷數內府藏本

欽定四庫全書總目卷二百三十二子部 雜家類存目九

明陳繼儒撰皆錄前賢格言遺事自惜福以至好  
還凡分二十類多以因果爲說蓋意在懲惡勸善  
而徵引糅雜遂近於小說家言

廣銷夏一卷廣碎寒一卷銷夏補一卷碎寒補一卷銷

夏再一卷碎寒再一卷寒夏合再一卷

編修勵守謙家藏本

明周詩雅撰詩雅有南北史鈔已著錄是編本陳  
繼儒銷夏碎寒二書更著此以推衍之編拾叢雜  
較之繼儒原書風更下矣

可如六卷

浙江巡撫採進本

明董德鏞撰德鏞字孔昭鄞縣人其書取禽獸魚  
蟲之事合於忠孝節義者分類摘錄共六十三門  
每門又各爲標目皆冠以可如二字如云可如鴨  
可如鶩之類頗爲近俚自序謂諸書所載散見而  
不聚隱而義未顯故特表以出之其名禽獸魚蟲  
其事則人也其曰可如者蓋心存乎勸戒也逐條  
之下附以評語大抵憤世嫉俗之詞有所激而然  
也昔開封阮漢聞嫉明末將帥之怯懦因輯古來  
婦人行兵制勝之事編爲二卷題曰女雲臺以深

愧之德鑄此編其用意與之相類蓋明之末造人心世道無不極敝故士大夫發憤著書往往如是云

枕函小史

無卷數  
內府藏本

明閔子忱編于忱始末未詳是編凡分二種一曰譚史採蘇米志林議論二曰癖史雜記古人癖事各加評點總不出明季佻纖之習

擣堅錄二十四卷

兩淮鹽政  
採進本

明朱廷旦撰廷旦字爾兼一號旋菴子嘉善人天

啟中貢生是書分一百類每類各為小序陳勸戒之旨而徵引故實列於後其末又綴以評論其凡例謂主於破疑掃疾故刺惡之條溢於獎善稱擣堅者謂如病之刺其堅也所言多主禍福蓋欲世俗易省耳

萃古名言四卷

浙江巡撫  
採進本

明趙民獻編民獻雲南人其書刻於崇禎初年康熙中交河王瑄官迤西道時得之於其子孫已殘闕失次瑄復增損其文後任湖廣學政時以授胡

之太刊之瑄任滿攜版北歸楚士子復爲重刻故  
是書有南北二本此卽南本也其書舉先儒嘉言  
懿行分類編輯凡四十六門多不載所出其凡例  
云或趙氏所自言或他書所常見故不復細加分  
別然體例殊不畫一各門之後之太又添綴評語  
尤爲蛇足瑄字昭玉交河人康熙癸丑進士官湖廣  
提學副使此本皆題王瑄蓋傳刻之誤之太字聽  
巖黃州人其仕履未詳

昨非齋日纂二十卷

江蘇巡撫  
採進本

明鄭瑄撰瑄字漢奉聞縣人崇禎辛未進士官至  
應天巡撫此書皆記古人格言懿行區爲二十類  
每類各爲小引然議論佻淺徵引亦多雜糅冥果  
一類皆出小說家言尤不可爲典要

迪吉錄九卷

內府  
藏本

明顏茂猷撰茂猷字壯其又字仰子平湖人崇禎  
甲戌特賜進士是編分官鑑公鑑二門皆雜錄諸  
書因果之事

明百家小說一百九卷

浙江巡撫  
採進本

舊本題明沈廷松編廷松號石閭未詳其爵里前有自序題甲戌小寒日當為崇禎七年而其書乃全與

國朝陶珽續說郭同蓋坊賈以不全說郭偽鐫序目售欺也

讀書止觀錄五卷

浙江巡撫採進本

明吳應箕撰應箕字次尾貴池人崇禎壬午副榜貢生順治元年

大兵破南京殉節死事蹟附見明史邱祖德傳明末

稱復社五秀才應箕為首其克全晚節尤不愧完人然是書乃襲陳繼儒讀書十六觀之餘緒推而衍之雜引古人論讀書作文之語而稍以己意為論斷語意儂佻頗類明末山人之派又每條之末必終以讀書者當觀此六字五卷皆然蓋做十六觀中讀書者當作是觀之例尤病於效顰

韋弦自佩錄十二卷

浙江巡撫採進本

明朱輔撰輔號杲菴建德人官至簡州知州此書取唐宋以來議論事實可為法戒者分類摘載分



十二門頗雜以禪門宗旨未為精粹嘗再刻於壺  
關及桂林兵燹散佚康熙四十一年其子雯重刻  
於江甯前有王士禎序稱仿白孔六帖而作然六  
帖乃類書無所不備此祇錄前言往行實趙善璫  
自警編之流士禎所言非也

廣仁品二集

無卷數 副都御史黃登賢家藏本

明李長科編長科字小有揚州興化人此書闡明  
佛家戒殺之說皆雜舉故實以明因果題曰二集  
當尚有初集今未之見

今古鉤元四十卷

山東巡撫採進本

明諸茂卿撰茂卿字子茂諸城人是編所取大都  
小說為多雜糅不倫又不分門類引證亦往往踈  
舛如第二十一卷吞舟之魚一條云出劉向談叢  
向無是書也

山樵暇語十卷

浙江范懋柱家天一閣藏本

明俞弁撰弁始末未詳是書雜錄古今瑣事及詞  
章典故閒加考據亦有全錄舊文者蓋偶隨所得  
而錄之故編次皆無倫序亦多踈舛如稱唐韋莊

上書浙帥之類不一而足

楊氏塾訓六卷

江蘇巡撫採進本

明楊兆坊撰兆坊字思說杭州人其書分門編次自居家至交友服官每類各引經史成語以為法式蓋家塾童蒙之訓然較少儀外傳諸書不及遠矣

著疑錄九卷

江西巡撫採進本

明戴有孚撰有孚字聖山永新人是書分十六門皆鈔撮諸書而成體例頗為叢脞如第一門曰儒

次之以藝文又次以士次以老佛仙術儒即士也乃分而為二又七卷父子祖孫為一門附以奴僕君臣夫婦兄弟乃皆不及其中舛謬不可殫述所隸之事與門目不相應者十之五六更不解其何說也

布粟集八卷

浙江范懋柱家天一閣藏本

不著撰人名氏但自題曰布粟子又自題其號曰鳳臺不知何許人也其書採管子至郁離子凡八十餘家各摘數語自序稱雖不足於連篇大觀然

終身玩之愈覺有餘味故曰布粟然詮次殊無意  
義蓋欲仿馬總意林而不及其去取之精也

九朝談纂

無卷數 浙江范懋  
柱家天一閣藏本

不著撰人名氏輯明太祖至武宗九朝說部雜事  
共爲一書分太祖爲三冊成祖以下爲七冊前列  
所採書目凡五十餘種而卷內所輯書名尙有在  
所列之外者蓋江少虞事實類苑之類然採摭未  
備去取亦未精也

觀生手鏡一卷

浙江巡撫  
採進本

舊本題積川布衣編不著名氏書中摘載古事每  
事綴以評語所徵引至明代而止其持論不甚謬  
而詞氣儂薄皆明末山人之習必萬歷以後人作  
也

枕中祕

無卷數 浙江  
汪啟淑家藏本

明衛泳編泳字永叔蘇州人王暉今世說曰吳門  
之有永叔兄弟猶建安之有二丁平原之有二陸  
時人號稱雙珠其弟著作今未見是編仿馬總意  
林之體採掇明人雜說凡二十五種曰閒賞曰二

六時令曰國士譜曰書憲曰讀書觀曰護書曰悅  
容編曰勝境曰園史曰瓶史曰盆史曰茶寮記曰  
酒緣曰香禪曰棋經曰詩訣曰書譜曰繪鈔曰琴  
論曰曲調曰拇陣曰俗砭曰清供曰食譜曰儒禪  
皆隆萬以來纖巧輕佻之詞前列凡例二十五則  
題曰致語考宋代教坊乃有致語而泳取以自名  
尤可異之甚矣

百子金丹十卷

內府藏本

明郭偉編偉字士俊泉州人其書分文編武編內

編外編奇編正編六門所採上自周秦下迄明代  
詭立名號不可究詰如曹植七啟設為鏡機子問  
荅卽割其一段題曰鏡機子其大略可知矣

諸子褒異十六卷

江蘇周厚  
堉家藏本

明汪定國編定國字蒼舒海甯人是書採錄諸子  
俱取其文字之奧僻者於佛氏為尤多而邵子張  
子蔡季通諸儒之說亦一槩摛入純駁互見頗為  
糅雜且所標書名大半今世所未見率以意為之  
尤明季錮習也

欽定四庫全書總目卷一百三十二

番禺張兆錦初校  
順德馮佐勛覆校

欽定四庫全書總目卷一百三十三

子部四十三

雜家類存目十

豐暇觀頤四卷

安徽巡撫  
採進本

不著撰人名氏有序三首一稱懶散道人一稱見  
廬主人一稱醉醒逸叟而卷首復題醉醒逸叟偶  
闕字詳其詞氣當是一人一題已丑一題辛卯一  
題癸巳皆不著年號中引湯賓尹睡菴集考睡菴  
集序題萬歷庚戌則此書在是集之後已丑為順

治六年辛卯為順治八年癸巳為順治十一年是國朝人矣其曰豐暇蓋取謝靈運詩臥疾豐暇豫之意皆雜引文集說部不分門目多放曠之言出入於佛老之間至於元帝垂訓之類亦登簡牘孰聞之而孰錄之乎

懿行編八卷 浙江巡撫採進本

國朝李澄撰澄字鏡石揚州興化人其書取諸史中嘉言懿行可為法程者分類標題紀事之後閒為論斷遠自上古近至明代凡二十九門每條

皆載所採書名而於前人論斷亦節取其一二焉

無事編二卷 兩淮鹽政採進本

國朝項真撰真字不損秀水人前明諸生八

國朝官景陵縣知縣是書摭拾成文漫無風旨雜引故實皆仍其原文今古不辨甚至以喬知之為晉人疎陋可知矣

葉書一卷 安徽巡撫採進本

國朝黃生撰生有字詒已著錄是編皆錄載籍中新

雋字句然所採多不倫蓋亦從類書摘鈔以備文字之用非以是為著述也

倫史五十卷 直隸總督採進本

國朝成克鞏撰克鞏字清壇大名人前明崇禎癸未進士

國朝補選庶吉士官至保和殿大學士是編以五倫分五門各有子目君臣為數四十五父子為數二十二夫婦為數十一兄弟為數十六朋友為數十三考克鞏休致在康熙三年此書成於康熙十

六年蓋晚歲田居借編摩以送老採摭蘇雜固非所計也

多識集十二卷 直隸總督採進本

國朝魏裔介編裔介有孝經註義已著錄是書凡八種一曰快書祕錄二曰廣快祕錄三曰明百家說皆雜錄前人之說四曰耕餘雜語為寧陽張攀龍撰五曰譚韻新書摘王元禎湖海搜奇等書而成者六曰遺詩碎金則皆詩話也七曰三國問答為陳繼儒撰八曰梨雲尺牘為袁宏道撰皆取各家原

本節錄之不足以言著書也

雅說集十九卷

直隸總督採進本

國朝魏裔介編是書採雜記小品凡十九種一日劄記內外篇二日閒居擇言三日小心齋劄記四日南牖日箋五日忠節語錄六日歲寒居荅問七日大中八日述古自警九日居學錄十日庸言十一日好善編身世言十二日荆園小語十三日野語十四日知至編十五日芝在堂語十六日管言十七日剩言十八日中語十九日退居瑣言皆明季

及

國初人作亦裔介隨意摘錄刻為一集

佳言玉屑一卷

直隸總督採進本

國朝魏裔介編其體例與多識集雅說集相同所採凡陳繼儒讀書十六觀十六條安得長者言四十二條嚴栖幽事二十九條徐太室歸有園塵談十一條屠隆娑羅館清言四十六條皆取之眉公祕笈中也

牛戒續鈔三卷

直隸總督採進本



國朝魏裔介撰裔介因

世祖章皇帝刊印牛戒彙鈔乃哀集諸書所載有關於牛戒者列為三篇自序謂發明彙鈔之本旨而推廣皇上好生之德云

希賢錄十卷 直隸總督採進本

國朝魏裔介編分為學敦倫致治教家涉世五門每門又各分子目以嘉言善行分註乃康熙辛酉裔介致仕後所作其嘉言多採諸家語錄善行則兼採雜說不甚簡汰云

資塵新聞七卷 直隸總督採進本

舊本題

國朝魏裔介撰其書亦鈔撮雜說而成卷一曰鬼神類皆記幽冥因果還魂託生之事遇仙佛名號必跳行出格書之已決非裔介所為至附冒襄鐫經靈驗四則其中先大夫字乃襄自稱其父亦空一字書之裔介亦未必如此之憤憤卷二曰陰陽類皆方術家言云出神樞經洞元經人元祕樞經次以楊光先陽宅闢謬次以星野諸圖卷三曰詞賦

類皆鈔錄優伶戲文小曲卷四曰韻學類全鈔顧  
炎武唐宋韻譜舊文卷五無門目其子目一曰南  
中遺事記福王時軼聞所記黃道周用兵必繫其  
兩手以防肆掠殆非事實一曰都門三子傳乃王  
崇簡作卷六曰盜賊類記李自成始末頗稱楊嗣  
昌之功而以蔡懋德與李建泰同稱皆斥為庸鄙  
亦非公論卷七曰方域類前為琉球圖後全錄張  
學禮使琉球記全書皆體例猥雜謬陋百出與裔  
介他書如出二手又裔介以講學為事而此書推

尊二氏如恐不及亦與其生平言行如出兩人疑  
或妄人所託名歟

嗜退菴語存十卷

浙江巡撫  
採進本

國朝嚴有穀撰有穀字旣方歸安人是書為其子我  
斯所刊稱其晚年結菴城東隅顏曰嗜退網羅古  
名儒碩輔嘉言懿行及陰陽圖緯兵農禮樂百家  
眾流之書探綜研究成一家言用以娛老名曰語  
存析為內外編外篇卷帙稍多故先梓內篇以問  
世其書凡分三十類分隸古事閒附論斷蓋亦格

言之類我斯所謂陰陽圖緯兵農禮樂者則未覩焉豈皆在外編乎

勝飲編一卷

編修程晉芳家藏本

國朝郎廷極撰廷極有文廟從祀先賢先儒考已著錄是書雜採經史中以酒為喻之語彙輯成編自序謂不飲而勝於飲故名之曰勝飲然所錄僅數十條簡略太甚如引祭酒挈壺氏之類亦多牽率

經世名言十二卷

江蘇巡撫探進本

國朝蘇宏祖撰宏祖字光啟湯陰人順治丙戌進士

官知縣是編多採宋人格言及明人語錄分志學明倫修己室欲慎言待人涉世治家訓後治道當官用人十二類其曰經世名言者自序謂關乎身心之學所謂名言禪乎出處之微所謂經世云

寄園寄所寄十二卷

江西巡撫探進本

國朝趙吉士撰吉士有續表忠記已著錄是編採掇諸家說部分十二門曰囊底寄皆智數事也曰鏡中寄皆忠孝節義事也曰倚杖寄述山川名勝也曰撚鬚寄詩話也曰滅燭寄談神怪也曰焚塵寄

格言也曰獮祭寄雜錄故實也曰豕渡寄考訂謬  
誤也曰裂皆寄記明末寇亂及殉寇諸人也曰驅  
睡寄遺事之可為談助者也曰泛葉寄皆徽州佚  
聞也曰插菊寄皆諧謔事也所載古事十之二三  
明季事十之七八採掇頗富而雅俗竝陳真偽互  
見第成為小說家言而已

擇執錄十二卷

直隸總督  
採進本

國朝王家啟撰家啟字誠菴蔚縣人順治辛卯舉人  
官廣東新會縣知縣是書雜採嘉言善事分三十

四門蓋鄉閭勸善之書趙善璣自警編之類也以  
擇執為名過其實矣

壽世祕典十八卷

兩江總督  
採進本

國朝丁其譽撰其譽字蜚公如臯人順治乙未進士  
官行人司行人是書專為養生而作凡分十二門  
日月覽曰調攝曰類物曰集方曰嗣育曰種德曰  
訓紀曰法鑒曰佚考曰典略曰清賞曰瑣綴所引  
各條俱各註書名於其下大抵撮月令廣義玉燭  
寶典諸書為之其法鑒典略二門有錄無書註云

嗣刻則未成之本也

同歸集十六卷

內府藏本

國朝吳調元撰調元字雨蒼石城人據卷首胡世安序蓋嘗以舉人官教諭者也是書成於順治丁酉雜採前古至明末

國初故實分孝順忠愛孝行世德義門女範放生佛果八門每條附以論斷大旨主因果之說故其自序稱願以是集告天下之讀孔孟書而存菩提心者云

聞鐘集

無卷數 浙江巡撫採進本

國朝勞大輿撰大輿有甌江逸志已著錄是編分為五集每集前俱有自序後附其子疇改其三集序中稱順治戊戌榜發落拓如故蓋嘗舉於鄉而不第者也所載皆前人格言懿行末附儒門功過格當官功過格二篇乃取袁黃顏光衷舊本刪補之其意在勸善規過而皆主於積德積福因緣果報之說則亦為下等人說法者也

遂生集十二卷

兩江總督採進本

欽定四庫全書總目卷一百三十三

子部

雜家類存目十

九

國朝王暉撰暉字丹麓仁和人是書前有順治庚子暉自序曰予所纂輯中善惡果報捷於影響無非欲使天下之人不失好生之意天下之物得遂樂生之情故以遂生為名書中盛陳因果多參以神怪之說如文昌化書之類皆據為實事蓋為悚動下愚設也暉所作今世說曰曹顧菴曰遂生集為鷺苑杠梁文津為藝林餽脯文津今未見此集則了不異人耳

畜德錄二十卷

江蘇巡撫採進本

國朝席啟圖撰啟圖字文輿震澤人官內閣中書舍人是集取周秦以來迄於元明嘉言善行分為二十一類亦開附批評取大畜象傳君子多識前言往行以畜其德之義故以名書

四本堂座右編二十四卷

江西巡撫採進本

國朝朱潮遠編潮遠字卓月揚州人其序自稱朱子之後當有所考也是書成於康熙甲辰分四門一曰起家二曰治家三曰齊家四曰保家每門又各分六子目每目為一卷皆雜採前言往行因舊文

而稍刪潤之

敦行錄二卷

浙江巡撫  
採進本

國朝張鵬翮撰鵬翮有忠武志已著錄是書輯古來嘉言善行以敦本適用分上下卷中間又分二十一門書成於康熙丁巳後十年丁卯慈谿縣知縣方允獻為之註蓋鵬翮官浙江巡撫時也所紀皆厚德之事而以徵驗一篇終之則近乎因果之說涉於有為而為矣故列之雜家類焉

學仕要箴五卷

江蘇巡撫  
採進本

國朝張圻編圻字邑翼崑山人卷首徐元文序謂莘田侍御始集仕學格言圻續為纂輯凡分十類曰存心曰省身曰型家曰處物曰養蒙曰舉業曰居官曰臨民曰仕宦曰慎刑首標蔣伊鑒定伊即序所稱莘田侍御是此書實伊所作而圻稍增益之其標曰鑒定者蓋讓其名於圻耳

秦氏閨訓新編十二卷

江蘇巡撫  
採進本

國朝秦雲爽撰雲爽有紫陽大旨已著錄是書成於康熙丙寅因呂氏閨範而增損之而分為后妃女

主女道兄弟婦道妯娌嫡庶母道後母雜錄處變

十一日則體例略殊

庸行篇八卷

浙江巡撫採進本

國朝牟允中撰允中字叔庸天津衛人是書因揚州史典願體集而參補之皆先正格言分門編輯自達觀以至警醒凡三十三類每類採輯數十則大都取其明白顯易可以訓俗化愚其立教類有允中自著讀書之法兼論及於時文竝引八股講論數條蓋以訓其家塾子弟者也

人道譜

無卷數浙江巡撫採進本

國朝閔忠撰忠歸安人是書仿劉宗周人譜之意以孝弟忠信禮義廉恥爲人之要分爲八集各爲標目雜採史事而各引先儒之說以發明之

讀書樂趣八卷

內府藏本

國朝伍涵芬撰涵芬字芝軒於潛人康熙丁卯舉人是書首載朱子四時讀書樂歌以見命名之意然四詩晦菴集不載據仙居縣志載此四詩題爲縣人翁森作稱森字秀卿號一瓢宋亡後隱居不仕



著有一瓢集云云則涵芬題為朱子者誤也書中分盪胸澄心澹緣怡情論文勵業品詩七類而怡情類半載花譜品詩類附入已作亦龐雜之甚

硯北雜錄無卷數 編修 勵守謙家藏本

國朝黃叔琳編叔琳有硯北易鈔已著錄是書上至天文地理下至昆蟲草木凡經史所載有及稗官小說據其所見各為採錄亦閒附以己意大抵主於由博返約以為考據之資中多簽題黏補之處皆叔琳晚年手自刪改蓋猶未定之本也

孝史類編十卷浙江巡撫 採進本

國朝黃齊賢編齊賢字敬思嘉興人是編前列孝經次述歷代帝王孝行次述歷代孝子各以事蹟相似者分類紀之凡二十有二門孝為百行之原發於至性各不相師未可究陳條目至於修道度親一門尤為二氏之言非儒者之道矣

經術要義四卷浙江巡撫 採進本

國朝高元標撰元標字琴山嘉興人其書雜採舊文分門排纂自孝行至閨範凡二十五目末附報應

一門所徵引尤涉荒誕標曰經術要義未免名實不符矣

查浦輯聞二卷

浙江巡撫採進本

國朝查嗣瑮撰嗣瑮字德尹海甯人康熙庚辰進士官至翰林院侍講是書乃鈔撮雜家之言可資博覽者大抵皆節錄原文無所考據間有自附新語不過數條下卷內有西湖事蹟十餘則乃以補吳煒錢塘志所未及者其以鶴林玉露爲葛立方作未免筆誤至以楊瑀爲楊琚以葉子奇爲葉子才

則校刊者之疎也

會心錄四卷

衍聖公孔昭煥家藏本

國朝孔尙任撰尙任有節序同風錄已著錄是編雜採古人清言佳事略如沈括清夜錄周密志雅堂雜鈔之例自序云不考出處不次前後不分體例閒有複譌者亦懶於刪蓋林居多暇姑以寄意而已非有意於著書也

範家集略六卷

原任工部右侍郎李友棠家藏本

國朝秦坊撰坊字表行號儼塵無錫人是編分身範

程範文範言範說範圍範自周秦以及明代凡前  
賢格言懿行彙爲一帙然頗冗雜如宋太祖誓碑  
一事旣以帝王之事雜於臣庶中而不殺柴氏子  
孫亦無預於身範也

範身集略八卷

浙江巡撫  
採進本

國朝秦坊編坊範家集略以身範爲先然僅書中之  
一門未爲賅備故繼爲此編專明範身之義分爲  
八部曰成部應部容部貞部慎部坦部辨部誠部  
每一部爲一卷各有子目共二十六目範家集略

皆不載所出之典而此所徵引必註某人某文體  
例較善然摭摭旣富亦不免儒墨兼陳

閑家編八卷

浙江巡撫  
採進本

國朝王士俊撰士俊字犀川平越人康熙辛丑進士  
官至河東總督是編分家訓家禮家政家壺四門  
又各立子目皆雜引古書閒參以已見大抵習見  
之詞其家壺之名又頗嫌杜撰於古無稽也

訓俗遺規五卷

江蘇巡撫  
採進本

國朝陳宏謀編宏謀有大學衍義輯要已著錄此書

欽定四庫全書

卷一百三十三

子部 雜家類存目十

乃其爲江蘇按察使時以獄訟繁多因集古今名言人人易曉者勒成四卷刊布宣諭後無錫華希閔爲之重刻又益以邵寶手帖顧憲成示兒帖高攀龍家訓及

國朝張英聰訓齋語及其先世宗韓所著家勸共爲一編云

學統存二十四卷

江西巡撫採進本

國朝宋士宗撰士宗有史學正藏已著錄是書分二十四門各爲一卷多摘錄前人之說其自序謂周

有老莊宋有象山明有文成兼之宗杲大鑑輩日與吾黨爭理卽濂洛關閩復生不能驟起而勝也大抵攻陸王之學以尊程朱然書名學統而中多雜引史事及說部諸書龐雜不可枚舉至志異一門尤多怪誕不經之語如清異錄所載繸繸司氤氳大使之類豈亦有關於道學之統乎

權衡一書四十一卷

直隸總督採進本

國朝王植撰植有四書參註已著錄是編雜採諸書之言而閒斷以己意分類四十子目一百四十九

每一類為一卷惟制勝分二子卷故為四十一卷  
其曰權衡一書者自序謂王充有論衡蘇洵有權  
書論衡權書皆為一家之私意而此一書則合古  
今之嘉言而為之權衡也然惟其為一家之言故  
其析理有定說雖偏而不雜植乃聚百家之言連  
篇累牘繁而無章忽似類書忽似說部其病正在  
不主一家也

多識類編二卷

兵部侍郎紀昀家藏本

國朝曹昌言撰昌言字禹拜新建人是編乃其劄記

之文分動物植物二門雜採諸書所載物性物理  
以儷語聯綴成文頗為博洽前有南城陶成序稱  
雍正丁未仲夏昌言以疾卒年二十有八其兄以  
所著格物類纂二卷付梓乞成為序所稱書名與  
此本不符末有其兄茂先所作行狀則稱昌言聞  
名山勝蹟異卉奇葩必周歷遊覽考究本末閒從  
野老農夫詢動植情形得其實歸即筆之於書所  
著有玉隆紀游多識類編輿圖輯略四書薈言諸  
書今仍名多識類編殆初名格物類纂後改今名

歟

養知錄八卷

編修曹錫齡家藏本

國朝紀昭撰昭有毛詩廣義已著錄是編乃其訓課  
家庭之作雜引諸書所載嘉言懿行而以己意發  
明之分爲八門一曰論事父母舅姑二曰論別夫  
婦內外三曰論處兄弟妯娌四曰論教子孫五曰  
論厚宗族六曰論御奴僕七曰論制財用八曰通  
論大旨皆爲家庭以內而設故不及涉世之事其  
曰養知錄者自序謂人爲利欲所昏習俗所染於

是盡失其本心之明豈人本無知哉蓋所以喪其  
良心者有由然耳特爲指其大義以養其良知良  
能故曰養知云

閑家類纂二卷

侍講學士彭紹觀家藏本

國朝彭紹謙撰紹謙字濟光長洲人乾隆丁卯舉人  
官至曹州府桃源同知是編哀輯治家格言分爲  
十類曰敦倫曰培本曰學術曰閑邪曰慎交曰壺  
教曰貽謀曰治生日馭下曰廣愛貽謀門後附家  
塾課約一篇則紹謙所自述也大旨爲啟導下愚

而作故多涉於計較利害然不談因果亦不談神怪在勸善書中猶為不詭於正云

課業餘談三卷

編修程晉芳家藏本

國朝陶煒撰煒字賓玉秀水人其書仿釋名廣雅之體採輯經史中淺近而易解者以類編載自天地至古音轉注分二十有一篇大概人所習知稍加哀綴別無考訂之處甚至採昭明文選之註連行累牘而沒所自來尤非著書之體

福壽陽秋

無卷數內府藏本

國朝魏博編博字約之江甯人其書凡分五集首集為勸善篇二集為省克編三集為修齊錄四集為秦庭鏡五集為清涼散皆取前人格言編次成書大旨勸人修福延壽故以為名然多主於因果報應故不免闌入二氏之說

言行彙纂十卷

江蘇巡撫採進本

國朝王之鈇撰之鈇號朗川湘陰人是編分四十門皆雜採古人嘉言懿行以己意潤飾之皆不著所出亦不盡原文所有蓋通俗勸善之書為下里愚

民而設者故語多鄙俚且多參以禍福之說云

諸儒檢身錄一卷

鴻臚寺少卿曹學閔家藏本

國朝令狐亦岱撰亦岱字太峰猗氏人由左翼宗學

教習官縉雲縣知縣是編即其官縉雲時所刻雜

採諸儒格言分為八門曰讀書曰講學曰治心曰

持躬曰處事曰接物曰理家曰居官共一百六十

二條各以己意發明之詞旨淺近蓋為初學設也

心鏡編十卷

浙江巡撫採進本

國朝譚文光撰皆哀輯前言往行之可為法戒者故

以心鏡為名分敦倫修身勤學積德治家居官涉

世愛物樂天養生十類每一類為一卷取格言舊

本鈔撮而成亦自警編厚德錄之類

子苑一百卷

衍聖公孔昭煥家藏本

不著撰人名氏鈔本之首有籍圃主人麥溪張氏

二少印不知為著書之人為藏書之人也其書雜

採諸子分人倫性行學業政事人事五門每門之

中又各分子目於一事而彼此異同或字句有增

損者皆參校分註其用意頗不苟而所載泛濫太



甚如博物志舊列小說家謂之子可也水經注則史部地理之書檀弓亦經部禮記之文總日子苑名與實不相應也是亦愛博之過矣

右雜家類雜纂之屬一百九十六部二千七百二十

三卷內十三部無卷數皆附存目

欽定四庫全書總目卷一百三十三

番禺張兆錦初校順德馮佐助覆校

欽定四庫全書總目卷一百三十四

子部四十四

雜家類存目十一

五子纂圖互註四十二卷

浙江巡撫採進本

宋龔之昂編士昂爵里無考前有自序題景定改元蓋理宗時人又有三私印一曰龔氏一日子質一曰石廬子蓋其字與號也是書於老子用河上公註凡二卷於莊子用郭象註附以陸德明音義凡十卷於荀子用楊倞註凡十卷於揚子法言用

李軌柳宗元宋咸吳祕司馬光五家註凡十卷於  
文中子中說用阮逸註凡十卷每種前各有圖而  
於原註之中增以互註多引五經四書及諸子習  
見之語未能有所發明其於文中子則竝無互註  
體例殊未畫一至老子之首列三圖一曰混元三  
寶一曰初真內觀靜令一曰金丹莊子之首惟列  
周子太極圖荀子之首列三圖一曰欹器一曰天  
子大路一曰龍旂九旒揚子之首列二圖一曰渾  
儀一曰五聲十二律文中子之首列二圖一曰世

系一曰年表無一足資考證者而莊子因大宗師  
篇有太極二字遂附會以周子之圖尤為無理核  
其紙色版式乃宋末建陽麻沙本蓋無知書賈苟  
且射利者所為因其宋人舊刻姑存其目以備考  
耳

藝圃蒐奇十八卷補闕二卷

編修汪如藻家藏本

舊本題明徐一夔編一夔字大章天台人僑寓嘉

興元末嘗官建甯教授

案一夔官建甯教授見其始豐彙與危素書明史本

傳不載蓋偶未考其文集

洪武初徵修禮書王禕又薦修元史

辭不至後起爲杭州教授又召修大明日歷特授以翰林官以足病辭歸事蹟具明史文苑傳翦勝野聞稱其官杭州教授時以表文忤旨收捕斬之殊爲妄誕野聞託名徐禎卿多齊東之語此亦其一也是書前有至正戊申自序稱錢塘陳子彥高避兵樵李惠子之五車茂先之三十乘攜以俱來適余亦棲止是邦嘗得借觀茲編皆古今名人雜著之小者從無刊版彥高檢有副本悉以贈余裝成若干冊名之曰藝圃搜奇云云彥高陳世隆字

也故是書或亦題世隆所編凡一百三種其中舛謬顛倒不可縷舉其最甚者如褚少孫補史記自前代卽附刊史記中竝非祕笈而取爲壓卷名曰史記外編又佚其平津侯列傳建元以來侯年表二篇摯虞文章流別論乃鈔藝文類聚太平御覽之文猶有所本也至谷神子卽博異記醴泉筆錄卽江休復嘉祐雜志蘇軾格物麤談卽僞本物類相感志俞琰月下偶談卽席上腐談楊萬里誠齋揮麈錄卽王明清揮麈錄鬼說之墨經卽鬼子一

墨經大抵改易書人名以售其欺至鐳績雖元明閒人而霏雪錄成於洪武中此編既輯於至正戊申猶順帝之末年何以預載其書且所錄灌畦暇語與李東陽重編殘闕之本一字不易豈元人所及見邪其為近時所贗託不問可知矣原本有錄無書者凡十三種

國朝曹寅為補錄之釐為二卷蓋寅亦為姦黠書賈所給也

柏齋三書三卷

浙江范懋柱家天一閣藏本

明何塘撰塘有醫學管見已著錄是書一為陰陽管見一為樂律管見一為儒學管見大都好為異說以自高如論陰陽則以周子相生之說為不可信於張子正蒙邵子經世諸書皆排詆其失論樂律則以蔡元定律呂新書為不可行并譏禮經之樂記為過當而失實論儒學則以朱子為欠明切而真德秀大學衍義於大學之道實亦不知皆所謂一知半解也末有崔銑跋銑學頗醇正而極稱所論之超卓殊不可解

欽定四庫全書

六詔紀聞二卷 戶部尚書王際華家藏本

上卷曰會勘夷情錄乃嘉靖十四年建昌道兵備副使俞夔處置四川鹽井衛土千戶與雲南麗永二府土舍爭界事公移案牘下卷曰南荒振玉乃乩仙方海何真人與夔等倡和之詩南京吏科給事中彭汝嘉合刻傳之夔門人李應元為之序二卷一記邊防一談神怪殊為不倫殆於無類可歸姑隸之雜編附存其目夔建德人正德丁丑進士汝嘉嘉定州人正德辛巳進士

木鐘臺集 無卷數 副都御史黃登賢家藏本

明唐樞撰樞有易修墨守已著錄此編凡分二十九種曰禮元剩語曰真談曰語錄曰遊錄曰周禮因論曰因領錄曰三十測曰咨言曰感學編曰荅言曰轄園窩雜著曰證道曰偶客談曰疑詮曰海議曰國琛集曰未信編曰館論曰易修墨守曰法綴曰列流測曰宋學商求曰枝辭曰積承錄曰政問曰莫越通曰嘉禾問錄曰春秋讀意曰激衷小擬析門分類俱各冠以序文其別行之本已各存

欽定四庫全書 子部 雜家類存目十一 五

目此其總匯之本也

邱陵學山

無卷數 浙江 吳玉墀家藏本

明王文祿編文祿有廉矩已著錄此本乃其彙刻諸書以擬宋左圭百川學海故以邱陵學山為名所載以千字文編次自天字至師字凡七十四種然欲矜繁富而考訂未精故類多刪節原文不能全錄又以前人文集所已載者析出而附益之彊立名目牽率殊甚至海沂子以下數種皆文祿自著之書而亦闕八其中尤不出明人積習非但遠

遜左圭即視商維濬吳瑄輩相去亦懸絕矣

陸學士雜著十一卷

浙江巡撫 採進本

明陸樹聲撰樹聲有平泉題跋已著錄是編皆其所著雜說曰汲古叢語一卷曰適園雜著一卷曰陸學士題跋二卷曰耄餘雜識一卷曰禪林餘藻一卷曰陸氏家訓一卷曰善俗禪議一卷曰病榻寤言一卷曰清暑筆談一卷曰長水日鈔一卷其中亦有別本單行者此則其門人子弟所合刊成帙者也

陸文定公書

無卷數 江蘇巡撫採進本

明陸樹聲撰是集首列適園雜著次清暑筆談次善俗裨議次鄉會公約次題跋皆其罷官家居時所作較陸學士雜著所刊少五種而多鄉會公約一種蓋其刻在雜著前也

兩京遺編五十七卷

內府藏本

明胡維新編維新餘姚人嘉靖己未進士官監察御史是刻凡新語二卷賈子十卷鹽鐵論十卷白虎通二卷潛夫論二卷仲長統論一卷風俗通十

卷中論二卷人物志三卷申鑒五卷文心雕龍十卷共十一種以所採皆漢文故以兩京名書其中如徐幹雖名附魏志然卒於建安二十二年附之漢末可也至於劉邵為魏人劉勰為梁人序乃稱以其文似漢而進之王充論衡劉向說苑實皆漢人之文又以其卷帙之多而棄之去取殊無義例且文心雕龍純為四六駢體而云其文似漢九乖謬之甚矣

紀錄彙編二百十六卷

浙江鮑士恭家藏本

欽定四庫全書總目卷二百三十四

子部 雜家類存目十一

七

明沈節甫編節甫烏程人嘉靖己未進士官至工部左侍郎諡端靖是書採嘉靖以前諸家雜記哀爲一集凡一百一十九種其中有關典故者多已別本自行其餘如王世貞明詩評之類則文士之餘談祝允明志怪之類又小說之末派一槩闌入未免務博好奇傷於冗雜且諸書有全載者有摘鈔者甚或有一書而全錄其半摘鈔其半者爲例亦復不純卷帙雖富不足取也

左傳國語國策評苑六十一卷

江蘇巡撫採進本

明穆文熙編文熙有七雄策纂已著錄是編凡左傳三十卷國語二十一卷戰國策十卷左傳用杜預註陸德明釋文而標預名不標德明之名國語用韋昭註宋庠補音戰國策用鮑彪註參以吳師道之補正均略有所刪補非其原文蓋明人凡刻古書例皆如是謂必如是然後見其有所改定非徒翻刻舊文也其曰評苑者蓋於簡端雜採諸家之論云

中都四子集六十四卷

江蘇巡撫採進本

欽定四庫全書

子部

雜家類存目十一

八



明朱東光編東光字元曦浦城人隆慶戊辰進士官分巡淮徐道以老子在亳莊子在濠梁管子在穎淮南子在壽春皆中都所轄地因與鳳陽府知府張雲登哀而刊之老子二卷用河上公註莊子十卷用郭象註管子二十四卷用房元齡註及劉績增註淮南子二十六卷用高誘註時郭子章奉使鳳陽每書各為之題詞其書刊版頗拙校讐亦略又於古註之後時時妄有附益殆類續貂遂全失古本之面目書帕本之最下者也

明小史八十九卷

浙江巡撫採進本

不著編輯者名氏彙輯明人傳記說部凡四十六種皆習見之本所錄迄於嘉靖中殆隆慶萬歷間人所刊也

山居清賞二十八卷

內府藏本

明程榮編榮字伯仁歙縣人是編列南方草木狀至禽蟲述凡十五種多農圃家言中惟茶譜一種為榮所自著採摭簡漏亦罕所考據

今獻彙言八卷

浙江巡撫採進本

明高鳴鳳編案明史藝文志高鳴鳳今獻彙言二十八卷此本止八卷據其目錄所列凡為書二十五種乃首尾完具不似有關蓋其版已散佚不全坊賈掇拾殘剩刻八卷之目冠於卷首詭為完書也

呂公實政錄七卷

山西巡撫採進本

明呂坤撰坤有四禮疑已著錄是書皆其歷官條約之類第一卷為明職第二至第四卷曰民務第五卷曰鄉甲約皆巡撫山西時所作第六卷曰獄

政第七卷曰憲約則為山西按察使時所作其門生趙文炳巡按湖廣時校刊之總題此名中憲約前有陳登雲重刊一序題萬歷癸巳而文炳序作於萬歷戊戌反在其後蓋諸書各有單行之本文炳特彙而刻之存其原序也

天學初函五十二卷

兩江總督採進本

明李之藻編之藻有頓宮禮樂疏已著錄初西洋人利瑪竇入中國士大夫喜其博辯翕然趨附而之藻與徐光啟信之尤篤其書多二人所傳錄因

欽定四庫全書  
卷一百三十四  
子部  
雜家類存目十一  
十一

哀爲此集書凡十九種分理器二編理編九種曰  
西學凡一卷曰畸人十論二卷曰交友論一卷曰  
二十五言一卷曰天主實義二卷曰辨學遺牘一  
卷曰七克七卷曰靈言蠡勺二卷曰職方外紀五  
卷器編十種曰泰西水法六卷曰渾蓋通憲圖說  
二卷曰幾何原本六卷曰表度說一卷曰天問略  
一卷曰簡平儀說一卷曰同文算指前編二卷通  
編八卷曰圓容較義一卷曰測量法義一卷測量  
異同一卷句股義一卷其理編之職方外紀實非

言理蓋以無類可歸而綴之於末器編之測量異  
同實自爲卷帙而目錄不列蓋附於測量法義也  
西學所長在於測算其短則在於崇奉天主以炫  
惑人心所謂自天地之大以至蠕動之細無一非  
天主所手造悠謬姑不深辨卽欲人舍其父母而  
以天主爲至親後其君長而以傳天主之教者執  
國命悖亂綱常莫斯爲甚豈可行於中國者哉之  
藻等傳其測算之術原不失爲節取乃併其惑誣  
之說刊而布之以顯與六經相齟齬則僨之甚矣

今擇其器編十種可資測算者別著於錄其理編則惟錄職方外紀以廣異聞其餘槩從屏斥以示放絕併存之藻總編之目以著左袒異端之罪焉

合刻五家言

無卷數 安徽巡撫採進本

明鍾惺編惺有詩經圖史合考已著錄是書一曰道言凡十二卷即文子也二曰德言分上下二卷即劉晝新論也三曰術言即鬼谷子也四曰辨言即公孫龍子也五曰文心雕龍凡十卷各書俱有專行之本不可強合而別立標題務為詭異可謂

杜撰無稽矣

夷門廣牘一百二十六卷

通行本

明周履靖編履靖字逸之嘉興人是編廣集歷代以來小種之書并及其所自著益亦陳繼儒祕笈之類夷門者自寓隱居之意也書凡八十六種分門有十曰藝苑曰博雅曰食品曰娛志曰雜占曰禽獸曰草木曰招隱曰閒適曰觴詠觀其自序藝苑博雅之下有尊生書法畫藪三牘而皆未刊入所收各書真偽雜出漫無區別如郭橐駝種樹書

之類始於戲劇其中間有一二古書又刪削不完  
如釋名惟存書契一篇而乃題曰釋名全帙尤爲  
乖舛其所自著亦皆明季山人之窠臼卷帙雖富  
實無可採錄也

鹽邑志林六十二卷

浙江巡撫  
採進本

明樊維城編維城黃岡人萬歷丙辰進士崇禎中  
以福建按察司副使家居張獻忠陷黃州抗節死  
事蹟附見明史樊玉衡傳是編乃維城官海鹽縣  
知縣時輯海鹽歷朝著作共爲一集凡三國二種

晉二種陳一種唐一種五代一種宋三種元一種  
明二十九種其中如陸績易解之類多出鈔合明  
人所著又頗刪節大抵近說郭之例其最舛誤者  
莫如顧野王之玉篇廣韻直音玉篇自唐上元中  
經孫強增加宋人又有大廣益會之本久非原帙  
舉今本歸諸野王已爲失考又玉篇自玉篇廣韻  
自廣韻乃併爲一書尤爲舛謬且玉篇音用翻切  
竝無直音之說忽以直音加之野王更不知其何  
說考首卷訂閱姓名列姚士粦鄭端允劉祖鍾三

人士莽固當時勝流號為博洽者也何其誤乃至於是哉

張氏藏書四卷 浙江鮑士恭家藏本

明張應文撰凡十種曰簞瓢樂曰老圃一得曰蘭譜曰菊書曰先天換骨新譜曰焚香略曰清閨藏曰山房四友譜曰茶經曰瓶花譜其清閨藏尚可資賞鑒考訂別有刊本附其子丑清河書畫舫後已著於錄其餘九種大抵不出明人小品之習氣其山房四友譜中所稱以史記真本刊今本之譌

者詭誕無稽不足與辨簞瓢樂中粥經一篇摹仿論語託諸孔子之言尤可駭怪一條云小子何莫喫夫粥粥可以補可以宣可以腥可以素暑之代茶寒之代酒通行於富貴貧賤之人一條云子謂伯魚曰汝喫朝粥夜粥矣乎人而不喫朝粥夜粥其猶抱空腹而立也與如斯之類殆於侮聖言矣明之末年國政壞而士風亦壞掉弄聰明決裂防檢遂至於如此屠隆陳繼儒諸人不得不任其咎也

格致叢書無卷數 江蘇巡撫探進本

明胡文煥編文煥有文會堂琴譜已著錄是編為萬歷天啟閒坊賈射利之本雜採諸書更易名目古書一經其點竄並庸惡陋劣使人厭觀且所列諸書亦無定數隨印數十種即隨刻一目錄意在變幻以新耳目冀其多售故世閒所行之本部部各殊究不知其全書凡幾種此本所列凡經翼十五種史外二十一種居官十二種法家十二種訓誡十四種子餘八種尊生十八種時令農事八種

藝術十種清賞十七種說類十一種藝苑三十五種較他本稍備或其全帙歟如經翼中壓卷三種摭王應麟困學紀聞論詩之語即名曰困學紀詩又摭其玉海中詩類一門即名曰玉海紀詩又摭馬端臨經籍考論詩數段即名曰文獻詩考已極可鄙末三種一曰張華博物志一曰李石續博物志一曰釋常談皆以小說家言謂之經翼不亦慎乎史外列禽經獸經又列戴埴鼠璞龔頤正芥隱筆記是於史居何等也居官列儀注便覽新官軌

金匱要略全書卷之二十三十四  
範官級由陞法家列行移體式告示活套訓誡列  
梓潼帝君救劫寶章如斯之類不可枚舉是尤不  
足與議矣

學易堂筆記一卷二筆一卷三筆一卷四筆一卷五筆

一卷

浙江巡撫  
採進本

明項臯謨撰臯謨字懋功自稱西山居士嘉興人  
鄭履清之婿也是書乃所作劄記分爲五編蓋竊  
襲洪邁容齋隨筆之例筆記之後附生生閣學易  
三章二筆之後附同時人贈言一卷三筆之後附

滴露軒雜著一卷四筆之後無所附但有自跋一  
篇五筆之後附明歷年圖一卷自吳元年丁未至  
天啟四年皆紀干支別無所載惟吳元年下註一  
條曰嘉興府鼓樓匾吳元年建十字而已其四筆  
自跋曰余年三十三之前不白相不讀書四十六  
之後又讀書又白相自今以往不知讀書之爲白  
相白相之爲讀書云云則其書可不必問矣

天都閣藏書二十五卷

兩江總督  
採進本

明程允兆編允兆字天民歙縣人故取天都山以



名其閣是書序稱丁卯長至不著年號相其版式全仿閔景賢快書確為萬歷以後之本所謂丁卯蓋天啟七年也所錄自鍾嶸詩品以下凡十四種中嚴羽滄浪詩話題曰滄浪吟卷蓋羽詩集本名滄浪吟卷明人所刻以詩話冠首允兆從集中剽出而不辨其為全集之名也雜評一卷不著名氏皆論書之語中忽云幃帽興於國朝此唐張彥遠之語也又稱我朝王孟端及沈周陳道復則明人語也參錯無章殆不知文義人所為袁昂書評之

後贅以筆陣圖張懷瓘書斷改其名曰書斷列傳敖陶孫詩評僅一頁有餘蓋自丹鉛錄鈔出而併評末楊慎之論連為陶孫之評蓋坊賈射利之本耳

眉公十集四卷

兩江總督採進本

明陳繼儒撰繼儒有邵康節外紀已著錄是書名為十集實十一種曰讀書鏡曰狂夫之言曰續狂夫之言曰安得長者言曰筆記曰書蕉曰香案牘曰讀書十六觀曰羣碎錄曰巖栖幽事曰槐談皆

在寶顏堂祕笈之內惟讀書十六觀一種為祕笈  
所未收簡端各綴以評其評每卷分屬一人而相  
其詞氣實出一手刊版亦粗惡無比蓋繼儒名盛  
一時坊賈於祕笈中摘出翻刻又妄加批點也

津逮祕書

無卷數  
內府藏本

明毛晉編晉有毛詩陸疏廣義已著錄此為所纂  
叢書分十五集凡一百三十九種中金石錄墨池  
篇有錄無書實一百三十七種卷首有胡震亨序  
震亨初刻所藏占笈為祕冊彙函未成而燬於火

因以殘版歸晉晉增為此編凡版心書名在魚尾  
下用宋本舊式者皆震亨之舊書名在魚尾上而  
下刻汲古閣字者皆晉所增也晉家富藏書又所  
與遊者多博雅之士故較他家叢書去取頗有條  
理而所收近時偽本如詩傳詩說歲華紀麗瑯嬛  
記漢雜事祕辛之類尚有數種又經典釋文割裂  
周易一卷尤不可解其題跋二十家皆鈔撮於全  
集之中亦屬無謂今仍分著於錄而存其總名於  
此以不沒其蒐輯刊刻之功焉

漢魏別解十六卷

內府藏本

明黃澍葉紹泰同編自吳越春秋訖於薛收元經傳凡四十六種其凡例云六朝諸家文集一篇不載而編中收江淹任昉諸集不一而足又云皆錄全文而節錄者亦復不少至近代偽書如天祿閣外史之類亦一槩濫收殊失鑒別

快書五十卷

兩淮鹽政採進本

明閔景賢何偉然同編景賢字士行烏程人偉然字仙臞仁和人是編割裂諸家小品五十種彙爲

一集大抵儂薄纖佻之言又多竄易名目如會心編改名秋濤醒言改名光明藏之類不一而足甚至周守忠之姬侍類偶改名姝聯姝卽姬侍聯卽類偶也亦可謂拙陋矣

廣快書五十卷

安徽巡撫採進本

明何偉然編偉然初刻快書五十種與閔景賢同訂茲又以五十種廣之同訂者吳從先也所採皆取明人說部每一書爲一卷卷帙多者則刪剝其文立名詭異有曰一聲鶯者有曰有情癡者有曰

照心犀者有曰嘔絲者所謂萬病可醫俗不可醫者歟從先嘗選明一代布衣之詩名布衣權惟紫淀老人張文峙家藏有寫本明季兵燹遂亡佚而快書百種最下最傳蓋其輕儇佻薄與當時士習相宜耳

皇書帝佚無卷數 江蘇巡撫採進本

明蔣軼凡編軼凡字季超諸暨人首載偽三墳及乾坤鑿度謂之皇書次載中天佚典託名五帝之言謂之帝佚前有自序稱遇遼陽韓友於燕都得

五帝佚典乃是箕子所贈漢初重購不得者其說極荒誕不經軼凡乃曲為註釋竝加評點以附會之真可謂不善作偽矣

覆古介書無卷數 安徽巡撫採進本

題東海黃禹金定邵闇生編不知為何許人分前後二集前集載豐坊偽大學古本大學石經古本偽三墳穆天子傳孔鮒小爾雅汪若海麟書郭璞山海經圖贊衛元嵩元包經傳魏伯陽參同契胡文煥逸詩論語會心詩南華逸楚衡嶽神禹碑文

漢滕公石槨銘吳季札碑後集曰史劄史遺左逸  
小易寤凡謙神握奇經奇門專征賦勝義諦均叢  
勝無緒蓋書肆粗識字義之人刊以射利者也

羣芳清玩 無卷數 江西 巡撫採進本

明李璵編璵字惠時蘇州人是刻為叢書十有二  
種曰鼎錄曰刀劒錄曰研史曰畫鑒曰石譜曰瓶  
史曰弈律曰蘭譜曰茗笈曰香國曰採菊雜咏曰  
蝶几譜竝題曰毛晉訂其書踏駁不倫蓋亦坊賈  
射利之本也

溪堂麗宿集

無卷數 浙江范楨心 柱家天一閣藏本

不著撰人名氏亦不著時代無序跋無目錄其名  
亦不甚可解首曰昭明遺事則撮取南史梁書數  
條次曰程氏家訓宋程若庸所纂次曰聖傳要旨  
題曰宋本心岷麓二先生著嗣孫輔之望集次曰  
文會燕語題曰東正鐸次曰巴山夜語題曰戚璞  
次曰林下常談題曰孔嚴化次曰山村雜言題曰  
齊馭莊次曰漁艇野說題曰武惠孫次曰林泉村  
話題曰孟德厚次曰蓮幕燕談不題撰人龐雜冗

次定回重全書總目卷一百三十四 子部 雜家類存目十一 三十一

欽定四庫全書  
目錄卷一百三十四  
瑣茫無端緒蓋庸陋書賈鈔合說部僞立名目以售欺范欽爲其所給遂著錄於天一閣耳

翰苑叢鈔十四卷

浙江范懋柱家天一閣藏本

不著撰人名氏取左圭百川學海所載諸書刪其書名卷數與撰人顛倒次序連綴鈔爲一編僞書之最拙者也

學海類篇

無卷數編修程晉芳家藏本

舊本題

國朝曹溶編溶有崇禎五十宰相傳已著錄此編哀

輯唐宋以至

國初諸書零篇散帙統爲正續二集各分經翼史參子類集餘四類而集餘之中又分行詣事功文詞紀述考據藝能保攝遊覽八子目爲書四百二十二種而真本僅十之一僞本乃十之九或改頭換面別立書名或移甲爲乙僞題作者顛倒謬妄不可殫述以徐乾學教習堂條約項維貞燕臺筆錄二書考之一成於溶卒之年一成於溶卒之後溶安得採八斯集或無賴書賈以溶家富圖籍遂託

名於洛歟

莊屈合詁

無卷數 安徽巡撫採進本

國朝錢澄之撰澄之有田間易學已著錄是編合莊子楚辭二書為之訓釋莊子止詁內篇先列郭象註次及諸家楚辭則止詁屈原所作以朱子集註為主而以己意論斷於後其自序云著易學詩學成思所以翊二經者而得莊子屈原以莊繼易以屈繼詩足以轉相發明然屈原之賦固足繼風雅之蹤至於以老莊解易則晉人附會之失澄之經

學篤實斷不沿其謬種蓋澄之丁明末造發憤著書以離騷寓其幽憂而以莊子寓其解脫不欲明言託於翼經焉耳

楊園全書三十四卷

浙江巡撫採進本

國朝張履祥撰履祥有沈氏農書已著錄是編為甯化雷鏞所刊凡十二種願學記一卷共一百九十九條皆其劄記講學之語問目一卷共三十八條皆其受業劉宗周時錄以就正之詞中載山陰劉先生批者即宗周也初學備忘二卷皆訓導後進之

言意在兼啟童蒙故詞多淺近經正錄一卷輯朱子訓學齋規白鹿洞學規司馬光居家雜儀及朱子增損呂氏鄉約合為一編近古錄四卷採明陳良謨見聞記訓耿定向先進遺風李樂見聞雜記錢蓑厚語各採其所記嘉言善行分立身居家居鄉居官四門見聞錄二卷記近時之嘉言善行喪祭雜說一卷皆糾時俗違禮之失學規一卷凡澉湖塾約十四條東莊約語五條答問一卷皆其門人張嘉珍問而履祥答前為答張佩璉別楮皆論

喪祭之禮後為答張佩璉所問皆雜考經史疑義佩璉即嘉珍字也門人所記一卷則嘉珍與姚瑚姚璉錄履祥之語訓子語二卷凡分十二綱一百四十五條蓋履祥晚始得子懼弗及教誨故畱以訓之農書二卷多就桐鄉物土言之履祥初講蕺山慎獨之學晚乃專意於程朱立身端直鄉黨稱之其書多儒家之言而近古錄見聞錄等率傳記之流農書又農家之流言非一致難以槩目曰儒家故著錄於雜家類焉

張考夫遺書五卷

兩江總督探進本

國朝張履祥撰是編書凡四種曰訓子語二卷曰經



正錄一卷曰備忘錄一卷曰書簡一卷張蘭臯序云訓子一冊先得我心因合數種授之梓人蓋刻於楊園全書之前故卷帙不及其富也

竹裕園筆語十二卷

禮部尚書曹秀先家藏本

國朝李曰滌撰曰滌字亦白臨川人前明歲貢生是編哀其平生雜著為之一曰邇言一卷皆辨析事理之談二曰蛩草一卷三曰梅草一卷皆戊子秋冬避兵山居所劄記三書識趣議論出入於屠隆袁宏道陳繼儒之間蓋明末風氣如是也四曰驅暑草一卷皆其客楚時作前為或問十章綴以無

富無分無過無不過四論皆借以發抒心跡五日餘

草一卷皆所作雜文六曰四書筆語六卷依經生義

自抒所懷與章世純畱書相類二人本同時又相善也

昭代叢書一百五十卷

編修勵守謙家藏本

國朝張潮編潮字山來徽州人是編凡甲乙丙三集每集各五十卷每卷為書一種皆

國初人雜著或從文集中摘錄一篇或從全書中割取

數頁亦有偶書數紙竝非著述而亦強以書名者中

亦時有竄改如徐懷祖之海賦去其賦而存其自註

改名臺灣隨筆黃百家之征南先生傳芟其首尾改名

內家拳法猶是明季書賈改頭換面之積習不足採也

丹麓雜著十種十卷

浙江巡撫探進本

國朝王暉撰暉有遂生集已著錄是編皆所著雜文一曰龍經擬禽經而作二曰孤子吟皆哭父之詩三曰松溪子皆筆記小品四曰連珠擬陸機體五曰寓言假禽蟲以示勸戒六曰看花述異記自記夢過古來諸美女事七曰行役日記乃康熙甲寅為其父乞銘於立輿述往返所經八曰快說續記因金人瑞西廂記評所說快事而演之九曰禽言效梅堯臣體十曰北墅竹枝詞詠其鄉之軼事每種有同時諸人序跋評語毛際可又總為之

序大抵皆明末山人之派而看花述異記摹仿牛僧孺周秦行記聚歷代妃主備諸冶蕩尤非所宜贊皇之黨託名誣奇章可也暉乃無端自誣乎

檀几叢書五十卷

浙江吳玉璣家藏本

國朝王暉張潮同編是書所錄皆

國朝諸家雜著凡五十種大半採自文集中其餘則多沿明季山人才子之習務為纖佻之詞如張芳之黛史丁雄飛之小星譜已為猥鄙至程羽文之鴛鴦牒取古來男女不得其偶者以意判斷更為

匹配其序文引譚元春之說謂古來多少才子佳人被愚拗父母板住不能成對齎情而死乃悟文君奔相如是上上妙策其語已傷風化書中以王昭君配蘇武以班昭配鄭康成以王婉儀配文天祥之類雖古之賢人不免侮弄至於以魏甄后配曹植以遼蕭后配李煜以漢班婕妤晉左貴嬪配梁簡文帝梁元帝則帝王妃后亦遭輕薄矣其書可燒奈何以穢簡牘也

政學合一集

無卷數 副都御史黃登賢家藏本

國朝許三禮撰三禮有讀禮偶見已著錄是集正編三十三種乃其宰海甯時所作其讀禮偶見一種為作於家居時亦編入其中續編十三種則其為御史以後所作而其後人又錄

諭

祭文行述誌銘附焉正編自讀禮偶見外所自著不過數篇篇不過數頁若會講之語雜錄羣言政績詩頌俱出他手合律全書樂只集登高唱和詩三種乃併有錄而無書蓋餽飭湊合摹印時有佚脫也續編自帝王甲子表聖孝廣義聖廟崇祀圖三種

外多與正編相出入大抵皆有意近名失於夸詡  
在海甯嘗建告天樓官京師時亦然所定告天工  
課儼然釋道家懺誦章呪之屬非儒者立言之道  
也

祕書廿一種一百五卷

江西巡撫  
採進本

國朝汪士漢編二十一種者其中三墳爲宋人僞書  
楚史檇杙晉史乘爲元人僞書劒俠傳竹書紀年  
爲明人僞書續博物志雖不僞而以南宋人爲晉  
人亦爲疎舛今已皆辨證於本書之下此因士漢

哀輯刊刻別立總名姑存其目備考焉

檢心集十四卷

湖北巡撫  
採進本

國朝閔則哲撰則哲字睿先應山人是集爲其子衍  
所編以語錄講義雜著與雜文參錯成書頗無條  
理其有書名者爲說書管見四卷又說書一卷訂  
學膚言二卷其不能以一卷者曰寬酌篇敢問篇  
偶及篇經說略史說略子說略仕語節錄論兵滿  
略遷議存稟惕愆質語節錄內則續言蕉窻筆談  
餘皆雜文其中論說旣繁不免小有牴牾如史說

略中引史記桀觀炮烙於瑤臺云云乃符子之寓

言史記實無此文也

右雜家類雜編之屬四十五部一千三百九十六卷

內十三部皆附存目  
無卷數

欽定四庫全書總目卷一百三十四

番禺張兆錦初校  
順德馮佐勛覆校

七三